

楊雲樵先生編

歷史摘要 上册

廣文社印行

中華民國二十二年一月一日印行



經售處

歷史摘要

每部上下兩冊

定價大洋三元六角

共  
冊  
180

編輯者 閩侯楊雲樵

發行者 福州廣文社

印刷者 福州華寶印務局

福州南大街 大酉山房書局

廈門橫竹路 新民書社

編者楊雲樵先生遺像



## 編者略歷


本書編者楊梯青先生原名榮年字惠齋號雲樵晚號爛柯閩縣人也家貧勤學弱冠補弟子員戊子舉於鄉當先生髫齡時沈文肅公創船政招學生以直在其中矣命題面試畢深加獎許教以讀金陳文並以會試硃卷贈之於是先生雖習西學而於中學仍不稍輟學業將卒有放洋之議其封翁子珍公以獨子不令遠行先生亦以諸堂弟失學恐墜書香迺改習舉業專心研究經史古學時已二十有一歲矣因從周秀庚先生遊名冠同門自是與考鰲峯鳳池致用正誼各書院疊列前茅文名大噪鄭雲友鄭虞臣郭遠堂邱鏡泉諸山長咸以遠大期之唯先生淡於仕進戊子以後歷管船政各廠並充海軍學校健丁營藝術學校飛潛學校監督教員凡四十餘年雖屢獲獎叙而無意出山七上公車五薦一備旁觀爲之惋惜不已而先生泰然自若也戊辰夏其長公子穉雲長廈市公安局間以辦事棘手家書中以進退請先生示先生曰亂世一官無足輕重旣不能本所學以爲用何

如潔身而引退細譯其言而益信 先生之恬退矣 先生於讀書之暇兼習岐黃之術多有領悟積數十年之久而詣益精清季洪梓青軍門奉命提督福建水陸軍由京來閩途中得病諸醫束手延 先生診愈乃邀赴廈聘爲提署醫官自是醫名大著登門求診者踵相接然 先生活人雖多雅不欲懸壺問世嘗曰醫學至奧若偶不慎則功不補過矣晚年家居不問時事恆致力於編述著有雜體詩文尺牘經解論議各若干卷蒙養必讀二卷醫學正鵠八卷醫案述畧二卷醫餘談屑二卷此次印行之歷史摘要二冊亦其一也辛未三月卒春秋七十有九

廣文社謹誌

# 叙

史之難治以其浩如煙海乎不但已也浩如煙海健忘者絀矣強記者無餘事乎古人言修史貴有三長曰才曰學曰識讀史何莫不然強記者學焉而已知去取爲識能驅使爲才不知去取不能驅使史不過陳陳相因之朽粟耳余早識 雲樵先生未及與上下議論奔走衣食四方四十年晚乃稔 哲嗣穉雲廳長于鷺門出其尊人所輯歷史擷要屬爲叙翻閱之則上下數千年僅約以二十萬言而國家治亂民族積強弱之故榮華大者罔不賅括而又非肌爲刪改悉變舊史之本來面目也斯以難矣夫以今日學子驚於新學會未有心得已舉吾中國之國家治亂民族積強弱之故懵無所知尙可稱中國人乎於是苦史書之浩如煙海乃乞靈於日本人東洋史輯要等編論其有系統有眼光未嘗非善本但患在太簡又舉吾舊史本來面目之雄傑而秀美者胥失之譬有人於此有骨無肉則一作標本之髑髏焉耳是編旣不屑如鑑撮之注意小典而貫串之善同於杜氏之讀史論畧其豐富遠過之豈僅備參攷已哉愚弟陳衍拜叙



# 序

太史公之言曰。儒家者流。博而寡要。韓昌黎之言曰。紀事者必提其要。信乎讀書之當知要。讀史之尤貴得其要也。同年楊君雲樵。好學深思。著書滿家。歷充馬江船政各學校監督。並迭主講席有年。苦諸生讀史無善本。爰采諸史中。有關於國家治亂。風俗醇疵。就時代之先後。語摘其要。文仍其舊。成歷史擷要若干卷。舉以示余。余受而讀之。見其去取謹嚴。蒐集締當。上下數千年。一氣貫注。有條不紊。其間辨是與非。勸善懲惡。懍然秉春秋筆削之嚴。而爲原史存真面目。洵可謂馬班范陳之功臣。涑水紫陽之畏友矣。夫以今日舉國尙新學。馳騁於九萬里之遙。憧擾於百二國之隲。摩醯十誠。希臘七賢。盧梭民約之論。拿破崙戰勝之書。幾於家置一編。風行九譯。問以三皇五帝之名號。堯舜禹湯之禪繼。漢唐宋明之統緒。大都數典忘祖。茲編其中流之砥柱乎。易曰。君子多識前言往行。以蓄其德。於世道人心。豈小補哉。君矜慎此書。不輕問世。余深喜其有合於孔聖述而不作。信而好古之義。特慫慂之以惠後學。是爲序。

民國辛酉孟秋年愚弟高向瀛書於榕垣知古軒

# 自序

昔房元齡褚遂良采一十八家言作晉書。而劉彭城譏爲解頤撫掌之談。歐陽修宋祁改劉昫舊唐書爲新唐書。而劉元城病其晦。吳縝糾其繆。何哉。詳簡弊均。作史所以難也。今學堂徧天下。趨時學多。考古日少。不特十七史二十四史。以及涑水通鑑。紫陽綱目。苦其繁冗。卽顧瑞屏史約。吳楚材易知錄。亦豈能全讀。無已。如裴子野刪宋書爲宋略。始可與言乎。雖然。無子野才識。而自我作古。顛倒是非。其毒中於人心。其禍及於世道。愚竊憂之。因參考諸書。刪繁補漏。裒集茲編。遊珠林但擷夜光。觀玉海惟取太璞。如挈重裘之領。不裁闊幅之衣。上下數千年。逐節接卸。例取遷史。國號年號。因文附入。例取班史。閒注地名音訓。以免北霍南衡。魯魚帝虎之訛。閱四寒暑。成二十萬言。繁非謝艾。未必無可芟。略非王濟。未必無可益。又豈敢詡三長。談二體乎。所冀學者從此問津。而進求之全史。則上溯結繩。下窮倚杵。庶無望洋之嘆云爾。

民國戊午仲春閩侯楊梯青雲樵書於馬江寓次

舉吾國數千  
年興衰治亂  
之由去華存  
實堪稱善本

程時燏題



## 例言

一是書顏曰擷要。謹就前史原本。去其繁。擷其要。字句仍多照舊文。俾學者略知原史真面目。

一史寓褒貶。關乎世道人心。予奪失宜。流毒滋甚。是書但采事實。不參論議。至有關於治亂興亡。氣節文章諸紀載。尤不忍割愛。異於全易原文。渾寫大意。夾叙夾議者。

一吳氏易知錄。起盤古至明崇禎止。不錄三王。顧氏史約。起太昊至元順帝止。不及明清。是書起盤古訖清末止。上下數千年。一氣聯絡。視二書文則少事則多也。

一顧瑞屏先生丁明季。詎不知明事。然其自序有曰。必鑿然正史。乃敢收羅。稗野傳疑。皆置不錄。是書錄清事。以清無正史。第據聖武記。大清一統志。清史略。國朝先正事略。曾文正公大事記。節錄之。他書不敢濫取。

一閱是書者。或以新出坊本。各分章冊。此獨不然。有背時裁。應之曰。分章冊者。易於抒寫已意。自我作古。茲照遷史例。逐節接卸。遞錄原文。自有本然層次。奚分章冊

爲。

一是書爲課授學生而作。隨手掇擷。挂漏尙多。然如南北朝五季。羣雄割據。事冗名雜。亦條分縷析。備列顛末。閒加旁注。兼釋地名音義。聊資講解而已。

# 春秋列國興亡表

魯

姬姓侯爵周公子伯禽始受封都今山東曲阜縣傳三十四君八百七十四年楚考烈王滅之

衛

姬姓侯爵文王子康叔始受封都今河南淇縣傳四十一君九百零五年秦二世滅之

晉

姬姓侯爵武王子唐叔虞始受封都今山西絳州傳三十八君七百三十二年韓魏趙分篡之

吳

姬姓侯爵太伯與弟仲雍相繼君吳雍曾孫周章始受武王封因其地今江蘇蘇州府至壽夢僭稱王共二十一君六百五十年越句踐滅之

虞

姬姓公爵周章弟虞仲始受封都今河南虞城縣傳十二君四百四十九年晉獻公滅之

虢

姬姓公爵王季子虢仲始受封都今河南陝州傳至虢公醜四百四十九年晉獻公滅之

曹

姬姓伯爵文王子曹叔振鐸始受封都今山東曹州府傳二十五君六百三十四年宋景公滅之

滕

姬姓侯爵文王子叔繡始受封都今山東滕縣傳三十一君八百三十七年宋王偃滅之

燕

姬姓伯爵周支族召公奭始受封都今直隸薊州至易王僭稱王傳四十二君九百零一年秦王政滅之

蔡

姬姓伯爵文王子叔度始受封都今河南新蔡縣傳二十五君六百七十六年楚惠王滅之

鄭

姬姓伯爵厲王子桓公友始受封都今河南新鄭縣傳二十三君四百三十二年韓哀侯滅之

陳

媯姓侯爵舜後胡公滿始受封都今河南陳州府傳二十四君六百四十五年楚惠王滅之

杞

媯姓子爵禹後東樓公始受封都今河縣杞縣傳二十四君六百七十八年楚惠王滅之

宋

子姓公爵紂庶兄微子啓始受封都今河南商邱縣傳三十四君八百二十八年齊楚魏分之

齊

姜姓侯爵四嶽後太公望始受封都今山東臨淄縣傳三十君七百四十四年田和篡之

紀

姜姓侯爵都今山東壽光縣齊襄公滅之

許

姜姓男爵太嶽後文叔始受封都今河南許州鄭莊公滅之

薛

任姓侯爵黃帝後奚仲始受封都今山東滕縣齊宣王滅之以上三國多未詳

邾

曹姓子爵陸終後曹挾始受封都今山東鄒縣至穆公改爲鄒漢書地理志二十九世爲楚所滅

小邾

曹姓子爵曹挾後魯附庸左傳魯莊公五年書邾黎來來朝名未王命也後數從齊桓公會周室十命以爲小邾子亦楚滅之

越

媯姓子爵夏少康子無餘始受封都今浙江紹興府至句踐僭稱王再傳七世至無疆楚威王滅之

楚

芊姓子爵鬻熊後熊繹始受封都今湖北江陵縣至熊渠封其諸子爲王此僭王之始傳四十一君八百九十三年秦王政滅之

莒

己姓子爵少昊後茲與始受封都今山東莒州傳二十三君六百九十二年楚簡王滅之

秦 嬴姓伯爵伯翳後非子以畜馬蕃息周孝王封之秦今甘肅秦州及犬戎之難襄公將兵送平王東遷王舉故都畀之至惠文王僭稱王又至始皇一統共三十五君六百四十二年漢高祖滅之

## 七國興亡表

齊 陳完者陳厲公佗之子也仕齊改陳爲田周安王十一年田和篡齊求爲諸侯王許之都舊都至威王僭稱王傳七君一百五十八年秦王政滅之

韓 晉莊伯後韓虔始受封都今河南新鄭縣至宣威王僭稱王傳十一君一百七十四年秦王政滅之

魏 畢萬後魏斯始受封都今河南開封府至惠王僭稱王傳八君一百七十九年秦王政滅之

趙 蜚廉後趙籍始受封都今直隸邯鄲縣至武靈王僭稱王傳十一君一百七十六年秦王政滅之

燕楚秦同前

## 五胡十七國興亡表

前趙 先號漢匈奴人劉淵據平陽今山西平陽府至曜徙長安傳五主後趙滅之

後趙 羯人石勒據襄國今直隸順德府至虎徙鄴傳七主爲冉閔所篡稱魏前燕滅之

前燕 鮮卑人慕容廆據龍城今直隸大名府長垣縣至僞徙鄴傳四主前秦滅之

後燕 鮮卑人慕容垂據中山今直隸定州傳四主爲高雲所篡魏滅之

西燕

鮮卑人慕容冲據平陽至永徙長子  
今山西長子縣傳三主後燕滅之

南燕

鮮卑人慕容德據廣固今山東青  
州府益都縣傳二主晉劉裕滅之

北燕

信都人馮跋據龍  
城傳二主魏滅之

前秦

氐人苻洪據長安今陝西西安  
府長安縣傳五主後秦滅之

後秦

羌人姚萇據長安傳  
三主晉劉裕滅之

西秦

鮮卑人乞伏國仁據金城今  
甘肅蘭州府傳四主夏滅之

前涼

烏氏人張軌據姑臧今甘肅涼  
州府武威縣傳九主前秦滅之

後涼

氐人呂光據姑臧  
傳四主後秦滅之

南涼

鮮卑人秃髮烏孤據廣武今甘  
肅蘭州府傳三主西秦滅之

北涼

京兆人段業據建康今肅州高台縣匈奴  
人沮渠蒙遜篡之遷姑臧共三主魏滅之

西涼

隴西人李暠據敦煌今甘肅西  
安州敦煌縣傳二主北涼滅之

成

後改漢氏人李特據成都今四  
川成都府傳七主晉桓溫滅之